

UGOVOR

o nabavci i isporuci tri sanitetska vozila sa pripremom za ugradnju kardiomobila

I UGOVORNE STRANE

1. **Kantonalna uprave civilne zaštite Kantona Sarajevo**, ul. Hamida Dizdara br. 1., Sarajevo, koju zastupa direktor, mr. Mustafa Kovač, (u daljnjem tekstu: **Kupac**), ID broj: 4200665390008 i
2. **Verano Motors d.o.o. Banja Luka**, ul. Subotička bb, Banja Luka, kojeg zastupa direktor, Slađenko Galić, (u daljnjem tekstu: **Prodavac**), ID broj: 4400831540004.

U daljnjem tekstu Ugovora, kada se Kupac i Prodavac navode zajednički, tj. zbirno, tada su označeni kao „Ugovorne strane“.

II OSNOV ZA ZAKLJUČENJE UGOVORA

Osnov za zaključenje ovog Ugovora je Odluka o izboru najpovoljnije ponude za nabavku roba, Kupca, broj: 22-44-879-8/17 od 09.06.2017. godine.

III PREDMET UGOVORA

Član 1.

Predmet ovog Ugovora je nabavka i isporuka tri sanitetska vozila sa pripremom za ugradnju kardiomobila, prema tehničkim specifikacijama, koje su navedene u Tenderskoj dokumentaciji za nabavku robe Kupca, broj: 22-44-879-2/17 od 15.05.2017. godine, kao i u Ponudi Prodavca, br. 8/17 od 01.06.2017. godine, koje čine sastavni dio ovog Ugovora.

Član 2.

Tri sanitetska vozila sa pripremom za ugradnju kardiomobila (u daljnjem tekstu: roba), Prodavac je dužan isporučiti prema svojoj Ponudi, te po uputstvima Kupca i u skladu sa važećim sa tehničkim propisima, pravilima i standardima.

IV CIJENA I NAČIN PLAĆANJA

Član 3.

Ukupna vrijednost ugovorene robe definisane u članu 1. ovog Ugovora iznosi: 184.099.50 KM (slovima: stoosamdesetčetirihiljadedevedeset devet konvertibilnih maraka i pedeset feninga).

U ukupnu cijenu iz stava 1. ovog člana, uračunat je PDV.

Cijena je fiksna i ne podliježe nikakvim promjenama za vrijeme trajanja Ugovora.

Kupac se obavezuje da će ukupni iznos iz stava 1. ovog člana isplatiti na račun Prodavca broj: 5510010000887288 otvoren kod UniCredit Bank a.d. Banja Luka.

Član 4.

Ugovorne strane su saglasne da će Kupac ukupnu vrijednost iz člana 3. stav 1. ovog Ugovora isplatiti u roku od 30 dana od dana isporuke robe, ako prilikom primopredaje Kupac nema primjedbi na isporučenu robu.

U slučaju da se prilikom primopredaje robe, konstatuju nedostaci i odstupanja od tehničkih specifikacija datih u Ponudi br. 8/17 od 01.06.2017. godine, Kupac se obavezuje da će isplatu izvršiti odmah, a najkasnije u roku od 10 dana, nakon što Prodavac otkloni nedostatke konstatovane u Zapisniku o primopredaji roba iz člana 8. stav 1. ovog Ugovora.

Prodavac je saglasan da Kupcu neće zaračunavati zatezne kamate za zakašnjenje pri plaćanju preko „Trezora“, ako je Kupac u ugovorenom roku predao nalog za plaćanje, a Prodavac primio uplatu s odgodom od jednog ili više dana od ugovorenog roka iz stava 1. ovog člana.

V ROK I MJESTO ISPORUKE

Član 5.

Prodavac se obavezuje da će robu iz člana 1. ovog Ugovora, isporučiti najkasnije u roku od 150 dana od dana potpisivanja Ugovora na adresu: ul. Hamida Dizdara br. 1., 71000 Sarajevo.

Član 6.

Ugovoreni rok isporuke robe iz člana 5. ovog Ugovora, može se produžiti u slučaju:

- nastanka više sile ili drugih okolnosti koje Prodavac nije mogao predvidjeti,
- kada ugovorne strane sporazumno produže ugovorni rok.

Član 7.

Ukoliko Prodavac svoje obaveze, zbog dejstva više sile ili nastanka nepredviđenih okolnosti, ne može ispuniti u periodu od 60 dana, Kupac ima pravo na raskid Ugovora.

VI KVALITET ROBE

Član 8.

Prodavac se obavezuje da isporučena roba iz člana 1. ovog Ugovora, bude traženog kvaliteta i karakteristika, odnosno kvaliteta i karakteristika koji je dao u svojoj Ponudi, br. 8/17 od 01.06.2017. godine, a koju je Kupac odabrao kao najpovoljniju.

Kvalitet i karakteristika robe koja je predmet ovog Ugovora, kontrolisat će ovlašteni predstavnici Prodavca i Kupca.

Primopredaju robe između Prodavca i Kupca izvršit će ovlašteni predstavnici Prodavca i Kupca.

O navedenoj primopredaji robe sačinat će se Zapisnik o primopredaji, odmah, a najkasnije u roku od 24 sata, od prijema robe, koji će potpisati ovlašteni predstavnici Prodavca i Kupca.

Član 9.

Sva eventualna odstupanja i nedostaci, prilikom primopredaje robe, konstatovat će se Zapisnikom o primopredaji robe.

Prodavac se obavezuje da će primjedbe konstatovane Zapisnikom o primopredaji otkloniti, o svom trošku, odmah, a najkasnije u roku od 15 dana, od dana potpisivanja navedenog Zapisnika.

Ako u navedenom roku Prodavac ne otkloni primjedbe konstatovane Zapisnikom o primopredaji robe, Kupac zadržava pravo da raskine Ugovor.

VII OBAVEZE PRODAVCA I KUPCA

Član 10.

Prodavac se obavezuje:

- da će ugovorene obaveze izvršiti blagovremeno, u ugovorenom roku, stručno i kvalitetno u skladu sa važećim tehničkim normativima i standardima, sve prema dostavljenoj Ponudi;
- da će u roku od sedam dana od dana zaključivanja/obostranog potpisivanja Ugovora, dostaviti garanciju za uredno izvršenje ugovora u obliku bezuslovne bankarske garancije u iznosu od 10% od ukupne ugovorene cijene iz člana 3. ovog Ugovora, sa klauzulom plativo na prvi pisani poziv korisnika garancije i bez prava prigovora, sa rokom važnosti: rok izvršenja ugovornih obaveza + 60 dana;
- da će u najkraćem roku otkloniti eventualne nedostatke koji mu budu predočeni prilikom primopredaje roba iz člana 1. ovog Ugovora od strane ovlaštenog lica Kupca;
- da će prilikom primopredaje roba iz člana 1. ovog Ugovora, Kupcu predati svu potrebnu prateću dokumentaciju za istu i to: garantne listove za ponuđenu robu iz tehničke specifikacije, certifikate o kvalitetu isporučene robe, ateste, licence i drugu tehničku dokumentaciju.

Član 11.

Kupac se obavezuje:

- da će izvršiti uplatu ukupne cijene vrijednosti ugovorene roba iz člana 3. ovog Ugovora, na način i u roku utvrđenom u članu 4. ovog Ugovora;
- da će ukoliko ne nastupi nijedan od slučajeva koji bi zahtijevao realizaciju garancije za uredno izvršenje Ugovora u periodu važenja garancije, izvršiti povrat dokumenta ili sredstava koji predstavljaju garanciju za dobro izvršenje posla prema uslovima iz Ugovora;
- da će pismeno obavijestiti Prodavca o svakom eventualnom propustu Prodavca u odnosu na pitanja utvrđena ovim Ugovorom.

VIII GARANTNI ROK

Član 12.

Za isporučenu robu važi garancije proizvođača robe, s tim što je Prodavac dužan da svu dokumentaciju o garancijama proizvođača robe, pribavi i preda Kupcu, zajedno sa uputstvima za njihovu upotrebu.

Garantni rok teče od dana kompletne isporuke robe.

Član 13.

Prodavac se obavezuje da će u toku garantnog perioda, na osnovu pismenog ili usmenog zahtjeva Kupca, pružiti servisnu podršku za isporučenu robu u okviru ovlaštenih servisa u Bosni i Hercegovini na svojoj lokaciji ili lokaciji Kupca.

IX UGOVORNA KAZNA I RASKID UGOVORA

Član 14.

Ukoliko Prodavac ne izvrši svoje obaveze u ugovorenom roku, dužan je da, Kupcu za svaki dan zakašnjenja plati ugovornu kaznu u iznosu od 0,1% od ukupne vrijednosti ugovora bez PDV-a.

Ukupna vrijednost ugovorne kazne koja se plaća ne može iznositi više od 10% od ukupne vrijednosti Ugovora.

Član 15.

Ukoliko isporuka kasni duže od 60 dana, Kupac zadržava pravo jednostranog raskida Ugovora.

Razlog za raskid Ugovora može biti stečaj, likvidacija ili drugi oblik prestanka postojanja Prodavca ili više sile.

Član 16.

Ugovorne strane su dužne u roku od sedam dana obavijestiti drugu stranu o nastupanju razloga zbog kojih se ne može realizovati ovaj Ugovor.

X PRIJELAZNE I ZAVRŠNE ODREDBE

Član 17.

Na sva pitanja koja nisu regulisana ovim Ugovorom, a pojave se prilikom njegove realizacije primjenjivat će se odgovarajuće odredbe Zakona o obligacionim odnosima.

Član 18.

Ugovorne strane su saglasne da će sve nesuglasice i sporove, koji eventualno mogu da proisteknu iz ovog Ugovora, prvenstveno nastojati riješiti sporazumno, a ukoliko, iz ma kog razloga, to ne budu moguće, nadležan je Općinski sud u Sarajevu.

Član 19.

Ovaj Ugovor stupa na snagu danom njegovog potpisivanja od strane ovlaštenih predstavnika Prodavca i Kupca, i isti će se primjenjivati do izvršenja svih pojedinačnih obaveza predviđenih ovim Ugovorom.

Član 20.

Ugovor je sačinjen u 6 (šest) istovjetnih primjerka, od kojih svaka od ugovornih strana zadržava po 3 (tri) potpisana i ovjerena primjerka.

ZA PRODAVCA

Direktor

Sladenko Galić



M.P.

Broj: 105/17
Sarajevo, 03.07.2017. godine

ZA KUPCA

Direktor

mr. Mustafa Kovač



M.P.

Broj: 22-44-879-13/17
Sarajevo, 03.07.2017. godine